



*Les trois Maries vont au tombeau de Iesus pour oindre son Corps
& un Ange les console.*

LE premier iour des Sabbaths fort matin, Marie Magdeleine, & Marie mere de Iacques, & Marie Salomé, acheptèrent des senteurs aromatiques pour embaumer le Sauueur Iesus-Christ, mais il furuint vn grand tremblement de terre, car l'Ange du Seigneur descendit & roula la pierre arriere de l'huis du sepulchre, & s'assit sur icelle. Son regard estoit comme esclair, & son vestement blanc comme neige, & dit aux femmes; Ne craignez point, ie sçay bien que vous cherchez Iesus Nazarien, qui a esté crucifié; il est resuscité, & n'est pas icy: Venez, & voyez le lieu auquel on auoit mis le Seigneur; mais allez bien-toft, & dites à ses Disciples, & à Pierre, qu'il est resuscité des morts. Et voicy il ira deuant vous en Galilée, vous le verrez, comme ie vous ay dit. Adonc elles s'en allerent, & s'enfuirent soudainement; car elles auoient esté saisies de frayeur & de crainte, & coururent en grande ioye l'annoncer aux Disciples.